

臺省疏稿

卷之二

議處邊藩祿糧疏

准戶部咨該禮科都給事中辛自修題本部覆議恭候 命下移咨陝西巡撫都御史備將咨開事宜逐一從長計處傳當奏請前來以憑覆議施行等因題奉 欽依備咨到臣臣謹議照我 國家分封王 府頒給祿糧親親之恩備極隆渥然而紀綱法度載在令典亦凜不可犯樂善循禮

屢奉 璽書褒嘉縱欲敗度間亦明罰正  
法夫是以 恩威並舉知勸知懲而永保  
福澤於無窮也竊照本省建有

秦 韓 肅 慶四王府邇年以來歲祿均  
有拖欠惟

韓府宗支蕃衍積欠獨多漸有逼於窮乏不  
顧禮義凌侮有司肆無忌憚者矣頃值

韓王薨逝管攝無人尤為恣橫臣等方切隱  
憂仰荷

聖明從言官之請事下臣等計處敢不殫竭  
心思以備采擇臣惟親親仁也不得已而  
裁之以法者義也仁必盡而義迺可行故  
今韓府之事必先議祿糧以體其情而  
後可及於防範之法猶之天道資雨露以  
厚其生而後肅風霜以申其教也除臣等  
事得專行者不敢煩瀆聖聽外中間事體  
重大非可擅議者謹條為七事冒昧

上陳伏候勅下廷臣詳議施行

一曰補祿糧以濟窘迫查得 韓府宗儀  
每歲該支祿糧價銀一十二萬九千兩  
每歲額派夏秋糧共徵價銀六萬二千  
五百餘兩尚欠銀六萬六千三百餘兩  
未奉新例之前積欠自嘉靖三十九年  
至四十三年共該銀五十七萬九千七  
百餘兩例後四十四年四季共該銀八  
萬三千二百兩通共該銀六十六萬二  
千九百餘兩無從處補及查布政司廣

積庫見貯應解戶兵二部事例僧道度牒富戶稅契路引與同撫按巡茶解京贓罰及三司各道府州縣衛所一應贖戶口鹽鈔驛站商稅筏木等項銀兩約共銀三萬四千餘兩俱係解部之數臣惟祿糧額派有限宗支繁衍無窮今計積欠日多議停減則應得之數勢不敢言欲加賦則窮竭之餘民不堪命若非留止官銀補奏一二即目前之患

已不可彌將來之禍誠不可測即今議  
留前銀尚不足當二十之一舍此更無  
他望臣又伏思近議條例裁省祿糧不  
啻三分之一豈以有餘而儉於宗親  
各宗固亦心知朝廷不得已為是久  
遠之計今韓府必俟舊例補足方行  
新例則十餘年尚無完期是朝廷政  
令扞格不能進行矧新封宗儀何能  
枵腹以待於數年之後似應調停以協

情法乞 勅該部議擬將前應解各項  
銀兩盡兌解部存留本省與原額正項  
奏補本年分祿糧支給以後一體存留  
明開為 韓府截補祿糧支用仍將節  
年拖欠與今例後減定之數一新一舊  
相蕪開支縱不能補其舊欠樽節前數  
繼今每歲或可四季全支少亦不下三  
季如此庶匱乏得濟旦夕之急而新舊  
均霑惇睦之恩矣



二曰肅開支以息紛擾臣惟祿糧缺乏群  
宗紛擾祇緣未足其數情非得已然一  
遇支放之際或聚衆勢逼大肆喧鬧不  
容監牧稽察或已足而多求或既出而  
復入或二三互爭於公堂或四五攘奪  
於道路或自帶低銀抵換而詒弄府官  
或已動原封而駕言數缺甚至凌虐官  
吏橫逞流瀕似此弊端難以枚舉所以  
監牧府官方至即欲求去勢既衆而法

難行也乞勅該部查議行下臣等轉  
行各該王府今後凡遇放支長史司  
備將宗儀位員除親王另行支給  
外其餘分別某郡王府郡王一位鎮  
輔奉國將軍中尉各若干位郡縣主鄉  
君儀賓全支減支各若干位員照依食  
祿次第磨對無差造冊具領類授該領  
衙門會同長史等官當堂秤兌每員位  
各該銀若干合一府之宗儀筭祿糧

之總數通共該銀若干類收一區給與  
長史領啓 親王令旨發赴 邵王府  
仍督同教授等官逐位逐員分鑿包封  
唱名給散如有借貸等項令其出自  
行償還 郡王不得干預斷給亦不許  
各宗擅自出入擾亂衙門凌虐官司如  
敢故違各該委官就將應得祿糧一面  
扣收入官一面啓 王叅 奏處治永  
為遵守庶關吏簡便而辟宗不致紛擾

夫

三曰正體統以便鈐束臣惟宗室繁多  
全在親王鈐轄若王位乂虛則人  
情渙散易於玩肆今照韓府宗室中  
間玩法者往往有之該府曾經叅罰一  
二被叅之人亦即媒孽其短撫飾奏辯  
怏其惡憤以致人皆效尤動輒阻撓已  
非事體今值韓王新薨國爵未襲  
群宗視若等夷畧無畏憚若不明正體

統申明法紀則將來蔑視橫行日益難  
禁除喪禮 國事已該臣等會本具

題外乞 勅該部覆議蚤為請 勅一道專

諭 韓世孫攝行府事嚴禁闔府 示

儀務遵 祖訓不許乘隙逞私暴虐軍

民敢有抗違無忌者輕則徑自戒飭重

則具實叅 奏其被叅宗室並不許輒

自奏辯反肆誣捏如此庶體統正而人

心定矣

四曰補額員以資輔導查得 宗藩條例

一款今後長史必須科甲出身方許陞  
除紀善審理亦必以科貢正途充之良  
以長史主一府之事責任至重其餘或  
理刑名或資講讀凡以翊德輔善申法  
飭行非徒具官而已不得其人且不可  
而况久虛其職乎今查 韓府額設左  
右長史及審理教授等官各員缺近者  
一二年遠者三五年俱未除補間有已除

補者又皆畏難推避不肯赴任一切大小印務皆委奉祀典膳等土官代署人微職小素習卑下欲規正則禮法未聞責鈴束則威權不立宗室且願指氣使之何望裨益於萬一也乞勅該部速查該府左右長史并審理紀善教授等官已選者勒限到任管事敢有推避查行原籍提問治罪未選各缺逐一查出遴選才能盡數銓補嚴立限期前來

任事庶責備有人輔導有賴而薰陶啓迪亦宗儀變化氣習之漸也

五曰嚴門禁以懲遠出查得問刑條例內一款各

王府不許無故出城遊戲違者撫按等官奏聞又查得宗藩條例內一款今後宗室越關經過不許給以應付一面差人徑送間宅拘禁其同行人伴務要追究問擬極邊永遠充軍長吏等官定行革



職所奏情詞俱不雅理臣惟朝廷設  
法防範至嚴且悉在宗藩固宜恪守  
王章不離封域庶上以遵朝廷之法亦自  
不失尊重之體也近年韓府宗室任  
從自便輒擅出入雖設守門官軍畏懼  
不敢聲言雜遝無從詰問嘉靖四十二  
年間假以討祿為名倡衆百十餘位遠  
出數百里直至會城擾害地方凌辱官  
司雖叅懲一二其於體統已蕩然矣夫

出城遊戲立有奏聞之例越關奏擾  
復設送發之條何獨難行於韓府而  
無申嚴之禁乎況平涼鎮城密邇虜穴  
萬一奸細潛入內地詐冒宗室猝難  
辨別引惹貽患關係匪輕乞勅該部  
查議請勅韓府差委護衛或內官一  
員帶領旗校人等與同原設守門官軍  
時加盤詰但有宗室出城必先禁阻  
即啓親王以俟進止如有不遵禁

例私自潛出但至二三十里之外者許  
諸人盤詰伴送回府輕則量罰祿米仍  
加戒飭重則叅 奏處治同行撥置之  
人照例問罪發遣如係詐偽辯認捕獲  
即可潛消禍本如此庶足以嚴未然之  
防而亦保全 宗室之一道也

六曰處庶人以正名分查得 宗藩條例  
內一款 宗室姦收樂女與不良之婦  
所生子女已授封者爵職封號祿米盡

行革去未授名封者不許冒請文婦  
盡數逐出臣惟王府宗室出自天  
潢之派雖流行不可混淆近來韓府  
庶人積至一二百人動輒混冒宗室  
之內一槩擾攘真偽莫辯其間有犯法  
革降者有花生胤生革黜者既不載名  
主牒亦無祿食資生槩之以齊民則此輩自  
以為宗室而不耳隆之以宗室則  
宗人皆以為非類而見耻擬編籍以聽

其自營則條例之所未及任遊食而無  
所歸著則靡蕩將安所終乞 勅該部  
從長計議或將該府前項花生胤生降  
革等項之人盡數查出應否於該府州  
縣另立一籍量免本身差徭聽其自為  
生理或行 親王另置一冊收籍拘管  
仍於本生各宗依倚衣食在有司則官  
府之法得以繩之在 王府則 親王  
之法得以繩之庶

聖朝無法外之人弃置被霜泥之澤 天潢岸  
清混之防地方消積漸之患矣

七曰嚴間宅以防不虞先年 宗室有犯  
俱發高牆禁住繼因送發數多供給稱  
累議將情罪稍輕者收住本省間宅實  
亦禁錮之示譴罰以警其餘也臣等查  
得本省間宅拘收宗人罪犯不一大抵  
皆悖違 訓典自干法禁固宜安意順  
受而訪聞仍有矯恣不悛猶貽地方之

害者若不嚴加禁戢誠恐事端出於意外不得不為先事之防也乞 勅該部

查議專 勅本省 親王將前聞宅宗

人嚴加拘禁聽輪委內官一員帶領旗

校與同原委軍衛員役常川在於間宅

門首晝夜巡禁尙鑰封閉如遇供送柴

米小菜等項五日一啓放進敢有不遵

明禁或額外需索官民及私擅出入等事許

即具啓 親王輕則痛加懲戒重則奏

聞處治承委官員人等縱容懈弛聽  
與臣等叅究拿問如此庶宗室知法  
嚴而不致易犯地方藉備預而可保無  
虞矣

犬虜盤據臨河官軍奮勇斬獲疏

准鎮守陝西地方總兵官都督僉事郭江  
會稿嘉靖四十四年十一月十六日遵例  
赴靖虜衛調度兵馬防冬本年十二月二  
十一日蒙總督軍門鈞帖節據寧夏總兵



官吳昂等報有虜酋已克那言賓兔他卜  
狼等聚衆聲言入犯已經通行隄備訖嘉  
靖四十五年正月初一日寅時據山後火  
燒山墩軍錢定元傳接劉保兒墩軍孫仲  
呆傳紅柳灘河北地名飲馬口前來達賊  
六十餘騎到於北岸創立後面陸續行走  
不絕據此度料必是大虜遣來先鋒窺探  
虛實大舉繼後必圖狂逞當發靖虜守備  
楊鰲統領所部官軍馳赴李哈刺峴哈

吉一帶斷阻賊路總兵鄧江繞正兵官  
高嵐等三千餘員名趨紅柳灘一帶賊經  
要路嚴加拒守振揚軍威賊見有備即時  
旋回仍從原路去訖十七日據靖虜守備  
楊鰲呈解降人白七哇子可兒只供稱虜  
酋卜兒半糾衆去搶西番惟恐聲彼擊此  
一面傳諭叅將張弼遊擊趙九思守備杜  
龍張翼指揮沈忠等各整擐兵馬差人聽  
探并傳東西操防等官嚴明烽堠慎守城

堡及將所守黃河打開用心防範一面行  
令中軍高嵐守備蔣松千戶李煦百戶吳  
廷用楊鰲等各率所部官軍家丁於十八  
日寅時從七里口踏水過河江統領官軍  
三百員名繼後設伏及令守備楊鰲在於  
紅柳灘防遏蔣松等至十九日卯時馳至  
小松山瞭見大虜營帳常有達賊四起撲  
喊前來蔣松等督勵官軍家丁奮勇衝斫  
賊潰亂當就斬首奪馬收兵仍從原路

過河共斬獲首級三十二顆奪獲達馬一  
百四十五匹駱駝二十七隻牛二十九隻  
收獲夷器四百三十四件被陣亡軍丁四  
名射死操馬三十一匹除開呈總督軍門  
紀驗優恤給賞外等因會稿到臣案查先  
為防冬事該臣看得各該防冬官軍每每  
出邊不及其時致誤先事之防節行守巡  
兵邊等道并大小將領嚴限催促各該官  
軍依期馳赴原分信地設備防禦去後今

隼前因臣議照醜虜自冬徂春糾結聚衆  
臨河住牧蘭靖一帶實重涎內地志在乘  
隙深入不意我軍雲集先據要害此靜待  
而氣逸彼趨利而力勞過虎噬於方張之  
勢止狼貪於欲食之時將領奮迅以率先  
騎士勇敢而歿死雖云小有斬獲實已大  
挫賊鋒皆仰仗

皇上

文德昭宣

武威震響預伐犬羊之謀

遠致田禽之獲也有功員役例得陞賞

勅兵部查照議

請臣又竊惟賞罰者

人主之柄而亦遠臣所賴以激勸將士之大機也賞不濫及則人無倖心忍弗能與即衆將解體蓋將士致身徇功其所喁喁所望朝夕者爵賞耳乃令遲以歲月勘報逡巡題覆淹滯何以慰忠勇之心鼓行伍之氣宣華夏之威乎仍乞勅下該部轉行趙按御史照例紀驗如果斬獲真實別無隱匿失事等項情弊即為具一奏速賜施行

邊圉幸甚

議處財用以定經制疏

臣聞禦戎莫要於強兵足兵必先於足食然兵無實用則虛耗而無益費不搏節則滋冗而難繼方今財用匱乏諸邊供億委應查核至如固原一鎮乃三邊之總會全陝之要區主客兵馬節經議設調遣規畫已定固不敢薦有加增亦豈容妄為裁削今查各路兵馬在固原兵備道屬主兵國

原靖虜二衛鎮戎平虜西安群牧白馬下  
馬紅古海打刺乾鹽平灘十一所長樂廣  
寧等六監苑固原州土達官軍見在通共  
一萬九千三百九十八員名又選中正遊  
守等營家丁共二千一百五十五名除本  
色糧草外實用折色銀一十二萬一千二  
百四十七兩所屬倉場每年額入民運銀二  
十二萬九千七百七十餘兩屯糧銀二  
千八百八十二兩本色糧五千一百三十



三石草七千八百二十九束以上俱主兵  
應用雖總計該銀一十三萬二千六百五十  
二兩節因民運逋負屯糧拖欠大約每歲  
實解銀不及八九萬不敷支給以致拖欠  
各衛所少者一二十箇月多至四五十箇  
月俱無從處補近該軍門革去中正二營  
夜不收四百名馬一百匹每歲減銀一千  
九百餘兩每歲防秋總督軍門各營兵馬  
防禦修邊遊守等營兵馬住劄紅古城彭

陽等處擺守約有兵馬一萬二千一百五十餘員名此防秋之客兵也十一月終河凍調發遊兵一枝赴一條城正兵營督同西安等衛官軍共七千餘騎駐劄靖虜打刺赤平灘三處擺守黃河遊兵一枝并固慶二路守備秦州修邊營兵馬駐劄紅古城乾鹽池西安州海刺都四處城堡設伏應援并軍門調到各邊旗牌官軍等項約有一萬六千七百二十餘員名此防冬之客兵

也至二三月間動調各營兵馬俱赴固原  
鎮城挑選入衛遊兵及經過白馬黑水等  
倉與固原州倉駐劄關支錢糧此入衛之  
客兵也以上三項通共每歲約用銀六萬  
七千兩至於大虜入犯調動兵馬難以數  
計先年每歲分派鹽銀一萬二千二百餘  
兩京運七萬餘兩以上二項俱應支給客  
兵近將工本鹽銀三千九百六十餘兩停  
革四十二三四年解發固原京運銀僅有

四萬餘兩不敷支用該軍門禁單各營官  
軍經過西安州等處非百里不支行糧料  
草又單去塘軍五十二名馬五十二匹又  
將固原守備原統西安等衛馬隊官軍二  
百員名發回本衛以免行糧料草又查得  
固原中東西三路遊兵官軍各三千員名  
輪番入衛舊規將下班官軍分布各屬城  
堡防冬近議將來年入衛兵馬三千存留  
原駐衛所養兵秣馬免其防冬節省行糧

草料計前四項每歲減省客兵銀四千餘兩此客兵應用之數也在臨鞏兵備道屬主兵甘州中護蘭州二衛甘州群牧所

肅府儀衛司工正所官軍實在官軍五千七百九員名河州主兵河州衛并歸德千戶所官軍實在官軍五千九百一十四員名每年支本色糧五萬七千餘石折色糧銀二萬六千七百餘兩本色料一萬餘石折色料銀三千五十餘兩本色草二十三萬一

千餘束折色銀五千三百餘兩以上係  
係民運等項錢糧內支給並無動支年例  
客兵防秋防守會單青家翟家嘴乾溝郭  
城安定西鞏秤溝灣清水定遠金縣天城  
葦子灣等處地方駐劄防秋三箇月原擬  
馬步官軍共二千四百七十一員名內除  
會寧定遠葦子灣地方不係百里以外不  
支行糧旗軍四百三十三名外二千三十  
八員名計三箇月共支糧料草該銀三千

一百餘兩防冬防守一條城什字川買子桑園兜安寧鹽場西古城積積灘窄道黑天城等堡地方駐劄防冬三箇月原擬馬步官軍共九千八百五十六員名內除本鎮人馬防守積積灘天城安寧鹽場桑園兜等處非百里以外不支行糧二千七百三十二員名外七千一百二十四員名計三箇月共支糧料草該銀二萬五千六百六十兩以上防秋防冬二項官軍每歲共

該銀二萬八千七百六十餘兩俱先期動  
支庫貯年例銀兩并益引召商易買其糧  
舊用黃米小麥二色兼支每石米該價銀一  
兩以上其草上年因時歉草貴每束用價  
二分六釐遂以為常節年未減今自四十  
四年為始糧每石值銀八錢草每束遠者  
二分九釐近者二分五釐共減銀三千一  
百六十餘兩及每年各軍到日先後不齊  
逃亡事故等項仍捏虛名冒領今皆設法



稽查照名給散大約通共減銀六千餘兩  
以一年計之除淮浙鹽銀三千八百三十  
餘兩外與奉例停革工本鹽銀一千五百  
五十餘兩尚該年例銀一萬八千餘兩在  
兆氓兵備道屬洮州衛主兵官軍共四千  
四十六員名每歲該支糧料共三萬六千  
八百九十九石銀八百三十兩額派民運  
銀二萬九百三十五兩屯糧五千三百四  
十九石每年雖餘銀四千四百五十餘兩

俱在各州縣拖欠今革去不係百里以外  
傳塘夜不收八十六名該口糧銀二百二  
十餘兩又革去原調秦州衛禮店所防冬  
二箇月官軍一百三員名支糧料草銀一  
百一十餘兩裁減老幼軍伍五十三名每  
歲該糧三百二十七石岷州衛主兵官軍  
四千七百八十七員名每歲該支糧料五  
萬六千二百八十五石銀六百四十五兩  
額派民運糧四萬二千三百三十二石屯

糧七千二百二十七石草一萬八百四十  
束裁減老幼軍三十五名每歲該糧二百  
一十八石八斗其年例銀九千一百八十  
七兩專備防秋兵馬支用西固城千戶所  
主兵官軍共一千一百三十二員名每歲  
該支糧料銀五千三百六十二兩額派民  
運銀四千九百六十六兩屯糧屯草價銀  
五百七十四兩民糧二百七石階州千戶  
所主兵官軍共一千八百九十餘員名每

歲該支糧料一萬六千四百餘石銀三百  
三十餘兩額派民運糧八千三百九十餘  
石屯糧五千七百餘石草價銀六十餘兩  
文縣千戶所主兵官軍一千八百二十六  
員名每歲該支糧料一萬八千二百七十  
餘石銀四百一十餘兩原額民運糧一萬  
二千二百六十餘石屯糧五千一百七十  
五石以上並無客兵年例銀兩逃亡老弱  
隨即收補年例客兵銀兩歲有定數時不

可缺相應照舊在分守關西道屬平涼衛  
實在兵馬在衛者支給本衛屯糧僅足勾  
用赴邊者支給在邊行糧其中遊二營新  
軍五百八名內除退回無力騎征五十九  
名實在四百四十九名并步操修邊新軍  
三百五十餘名共該支京運銀三千五十  
餘兩原係議定之數無可裁減在分守河  
西道屬王兵慶陽衛并環縣所弘化等驛  
所各墩守城守備營萬安苑官軍并嘉靖

三十年奉例抽選入衛新軍通共六千一百二十餘員名每年共支本折糧五萬九千三百八十餘石料豆一千二百八十餘石草四萬二千八百餘束原額歲派本色屯糧二萬三千六百餘石豆一千二百八十餘石草三萬五千八百餘束民運折色糧銀一萬八千五百四十餘兩除前項官軍支給外剩民運銀六千五百一十餘兩客兵環慶槐安走馬等城堡防秋三箇月

共八千四百四十九員名共支糧料草該銀一萬七千五百三十餘兩如防秋各堡并入衛往還兵馬寧夏定邊防禦修邊等項客兵大約一年之中一十二萬六千有餘共支糧草料該銀二千六百餘兩通共每年該銀二萬一百四十餘兩內除將前支剩民運并歲派淮浙鹽引等項銀兩驛用外連奉例停革工本鹽銀一千七百四十餘兩尚該補發年例銀八千七百餘兩

以上年舊規合用銀一萬七千五百兩今以數計之裁減銀八千七百四十餘兩至於有警調遣應援兵馬出於數外於民運糧內節省銀六千五百餘兩其客兵應用錢糧俱係一定之數再無別項可減總計各道所出之數如彼所入之數如此闔鎮所需軍糧主兵取給歲額民屯客兵仰藉京運並引每歲該用銀兩除並引銀二萬四千餘兩外仍該銀九萬五千餘兩今止



額發年例銀七萬三千四百五十五兩五錢先年商通無阻京運以時平時僅可支待至於秋冬調發猶有匱乏之請邇來鹽引壅滯商人告累屢歲不完頃該部議將工本鹽引停革其應發年例自嘉靖三十五年起至四十五年止積欠銀二十五萬三千五百五十三兩五錢屢次請討俱未解發是以客兵所需不敷皆借主兵之餉積累至今衛所老伍軍糧拖欠數多上

馬噉噉待哺營伍日漸疲弱頻年聲息稍  
緩費止如常倘遇緊急動調策應則緩急  
何所取給且欠數日益增多含憤齎怨亦  
非所以安邊圉營伍之心也今各道多方  
樽節已減省銀共一萬八千餘兩此外皆  
經常實費雖年例盡解猶少二萬二千餘  
兩豈容於此數內更議減削以貽增劇之  
後慮乎如蒙

皇上軫念固原重鎮關係全省兵馬芻糧原無

虛糜乞 勅該部再加詳議上

請將該鎮年例銀兩查照舊額及時解發仍  
將以前積欠未發銀兩每歲量補十之一  
二以抵各衛所缺糧官軍一二月之數庶  
工馬克實鎮兵消意外之虞邊方賴藉而  
虜夷無乘間之逞矣

舉劾方面官員疏

竊惟藩臬之臣所以網維庶務表率有司  
所關甚重陝省地方廣濶設官獨多此時

格心於維新之化致謹於嚴核之餘爭相  
砥礪以赴功名之會抱忠敬之忱者誠多  
然乖舛拘局純疵不相掩者未盡無也臣  
待罪經年蓋嘗察其心行而甄別之矣如  
布政某涵養定而素節堅持才思優而世  
故練達敷歷既久隨在騰聲毅直不阿宦  
跡多蹇簡以剴劘責成於僚屬而甄別尤  
精抑而彌光致慎於收支而姦弊盡革叅  
政某本英敏之才而出之以毅有沉著之

蘊而守之以廉贊帷幄之籌秋防允賴擅  
仁明之譽政績懋昭又某春容儒雅之度  
易直明敏之才織造嚴工作之勤懲倍加  
精密驛傳察衝疲之勞費盡平侵漁久暫  
不渝崇卑一節叅議某高潔不群明通有  
用法紀飭而郡邑嚮風約束嚴而盜賊屏  
息浚泉之利澤既溥築臺之威武丕宣右  
叅議某持身雅重蒞事周詳和惠宜民頑  
橫囚之歛跡節廉率下訟獄咸賴實成又

某器宇恢弘才猷豁達議地方之興革洞  
悉隱微解嘯聚之頑真無煩兵甲威宣紀  
法惠溢撫綏又某溫文有度明作多功吏  
治精而問斷得情飭之文學操行潔而關  
防逾慎益以謙冲副使某器厚而端凝  
行周詳而恭謹密河防固城堡嚴外侮之  
侵陵儲兵餉召益商覃西陲之威惠食事  
某養盛而行裕文蔚而思清敦行誼以作  
人率知趨向懸鑑衡以較藝明析秋毫允

孚多士之心克稱師儒之選以上諸臣皆  
賢能昭著所當薦揚者也叅議其志向頗  
銳機警亦多惟英茂而未諳故驕揚而鮮  
實通舟車省脚力議非不嘉徒致勞民傷  
財因之中寢核軍伍慎關支始亦稱善不  
免扣除公費卒以招尤每喜事而驟更輒  
無益而有損且掄鎮各項出納動至萬餘  
未明而該道職專兵糧乃其本管重務知  
而自若寧無涉於嫌疑惜曰不聞將焉用

乎按察此一臣者在任不協人心遷官漸騰物論所宜改調稍裁抑以示曲全者也

舉劾有司官員疏

臣惟政化之隆汙視生民之休戚生民之休戚本守令之賢愚誠得其人則刑罰中而賦役均安田里而享樂利一方允有賴焉否則閭閻咨嗟愁嘆疾仇不暇奚望與民相安興化致治哉臣於秦中三任藩臬經年拊循度地方之繁簡難易既已稍諳



察民情之向背得失信不可掩茲當離任  
謹核實而 上陳之訪得知府某器宇端  
凝才猷練達關防鎮密錢穀釐出納之弊  
而遠近德其公平法律精詳訟獄悉幽隱  
之情而上下服其明斷正身以率僚屬威  
生於廉約已以先庶民節以行愛又某老  
練之才寬平之政悉心節愛而疲郡來蘇  
迭用柔剛而強宗見化既安舒而不惑更  
堅定以有恒同知某貌古朴而內秀守堅

定而才優委空盤署邑務規為隨事宜民  
勤解納撫逋逄緩急安常達變又其端慎  
老成忠信明決確乎定見惕之以勢而不  
阿凝然主持嘗之可欲而無染應朝絕  
科擾之議署府遺子惠之懷推官某本清  
修之志而出以明爽之才有果敢之能而  
守以謙虛之益論人審清濁之辯不事深  
求讞獄察微賤之情每多平反又其文能  
飭政靜不雜於喧囂善不近名誠無俟乎

矯強威儀敬慎恂恂猶自儒生擬議精詳  
斷斷真如老吏知州某精銳之資嚴明之  
政廉隅謹飭起敬憚於僚屬吏民法紀堅  
持遵禁例於催科聽訟又某志向端潔治  
行精詳省刑罰人以無冤重農桑俗知務  
本且一任已踰兩考信雅操不逐世情又  
某誠心直道節用受人明敏而操持尤其  
老練而幹濟有方上下孚心姦頑帖服知  
縣某茂年練識雅度通才區畫當而糾紛

不眩操切嚴而姦弊莫容度糧田使輕重  
適均議輸納則官民稱便又某志切功名  
才優吏事保甲行而守望有賴四境乂安  
催科善而逋負多完一時擅譽又某才本  
宜今心尤好古克寬克猛而盜息民安不  
援不陵而上信下服寓賑濟於工作勤勞  
愛於催科以上諸臣皆廉勤公謹所當薦  
揚者也又訪得知縣某性本愚昏行尤鄙  
劣任衝疲之邑整頓非才當兵燹之餘休

息無策始以糊塗廢事漸至貪黷敗名收  
糧索大戶之銀劉進朝等各輸伍兩聽訟  
利紙贖之罰小趙兒日收數金逆子李華  
送黃金得寬其罪姦夫何海鯢白銀反斷  
為妻積棍若胡連閻朝隆皆徇私以縱惡  
侵欺如周福侯廷祿亦受賄以容奸大拂  
人心久招物議又某賦性本闇出政尤疎  
師事吏胥牌票擾民而不知覺察賄養老  
吏求過邑而莫敢誰何里老稱前堂後

堂見面錢郭修誠歛送詞訟每明供暗放  
紙贖銀劉小四催收印簿索紙紅火戶之  
咨嗟何忍買辦用刑具各行之憤恨難聞  
借言受制於親實為同惡相濟此二臣者  
官箴已喪衆論不容所當罷斥以警官邪  
者也中部縣知縣某事體不達任氣好剛  
聽斷多偏淫刑作惡託朝 覲而科歛有  
跡聽該吏為之主張因餽送而分派不均  
致與史敢於謾罵勾攝公事差阜快至百

十餘人鄉村驚詫群小橫恣致放火燬農  
家廬舍告訐喧騰舉動已失人心粗鄙不  
堪民牧又某材本漆稅景近桑榆既習懶  
而無為復多病以廢事吏胥奸弊已極簿  
書寢閣無稽訟獄曲直不分民生手足何  
措且治境與家鄉但邇關節易於交通而  
礦洞結頑橫相尋縮朒不能禁戢此二臣  
者所宜降調閑散以責改圖者也

薦舉教職以飭學政疏

臣惟學校者人才所自出方今濟濟在位  
贊襄化理孰非師儒之所教育夫惟不得  
其人此教之所由以廢也其間迺有不移  
於卑陋之習而卓然懋成已成物之志者  
可無優異之典以風勵儒林哉竊見教諭  
某學可淑人桃李門墻莫不樂其啓發誠  
能動物充邪兵燹獨能保其室廬要從政  
之功能應奮庸於遠大又某年茂而克勤  
文藝志端而力懋修持義利之辯既明心



安卑薄上下之交以禮跡遠阿私又某置身禮義之中一心無累造士範圍之內四教克勤儒林之選既優政事之才亦裕又某丰儀出衆桀驁是循文敷帑而思深氣春容而行潔力辭邑篆雅薄紛華又某器宇整飭識趣高明夙負文名冠京闈之髦士暫安歲命允用世之清才此數臣者驗其學術之小試皆以盡職盡心察其意志之不凡必能立身立政所當薦揚以備擢

用者也。

舉劾武職官員疏

竊惟保疆圉以壯國威者存乎兵馭士卒以倡勇敢者存乎將方今良將之需甚急而西土又用武之地臣嘗察行誼於平居無事之時而充試材畧於臨戎防禦之日似亦稍得其梗槩矣訪得叅將某英銳有為機警多算遇擢執而身先士卒三軍樂其苦之同處番酋而力却餽遺諸部感

清平之惠又某奮跡行間數蒙矢石忠信  
無煩於文墨驅馳不懈於老成守鎮靖以  
無虞備固原而益慎又某謀勇兼資志操  
並勵恤士卒有威有愛勤訓練可守可攻  
備諸機宜隔河嚴堵截之畧身嘗戰陣近  
地多擒獲之功都司某性資爽朗年力精  
強省費以恤軍痛裁積習之弊慎行以防  
吏尤識政體之宜談沙漠之虜夷如指諸  
掌界邊疆之將領必殫厥心又某本武勇

之資騎射閑習負奮迅之氣號令嚴明稽  
查實而撫愛多軍威授醪之惠防檢慎而  
督率謹身無襲綺之風遊擊某性資朴實  
膽氣驍雄控躍素優遇虜率先騎士紀律  
既整擺邊克振威聲守備某力精騎射畧  
本韜鈴威振羌胡雅有膺揚之氣素諳邊  
務方圖鴈塞之勲指揮某行勤而事每適  
宜志遠而行不隨俗提兵環慶軍士歸心  
防守商於礦徒欽跡又某年力精壯武藝

熟閑掌印科索無閑應接尤敏兵防分布  
有法機警復多干戶某曾隨戰陣頗諳邊  
情計議有條廢政也操成濟心行不苟修  
矯節費無私以上諸臣職業不同器識亦  
異要之皆堪適用可克總副叅遊之選似  
應薦揚以備錄用又訪得遊擊某起行伍  
而機警知兵經戰陣而功能頗著累官漸  
顯志意已懈於宦成歷歲近衰情欲遂忘  
於戒得指秋防更換把總所需動致千金

尅班軍馱馬料銀總計不下數百本以不  
揚之貌老云亦見侮於人頃當痰厥之餘  
將來必無濟於事此一臣者職業既墮邊  
防無益所宜憫其積勞姑令解任以終餘  
生指揮某負婁不檢沉酒日滋加收徭戶  
納銀每令加四加五梁圯等告許可查刁  
勒應襲禮物甚至一名十兩王以寧輩怨  
忿未已接旨紅帽細物也每屯科索二兩  
他可類推以點催糧公事也每名見面八

錢數積不少問刑乏通明之見僅資紙贖  
之需馭下無紀律之嚴徒取狎侮之辱此  
二臣者所且單任仍行提問以示警戒庶  
忠勇者有勸而益奮縱廢者知警而改圖  
武威振而逕防嚴矣

增修極衝邊垣墩堡報完疏

據固原兵備副使王宮用會同陝西總兵  
官呂經開報修完靖虜裴家川邊工文冊  
呈報到臣查為增修極衝邊垣墩堡添

設守備官兵據地險扼虜患慎固河防以  
保安內地事先該督撫會議題稱靖虜地  
方直至寧夏中衛切近虜巢最為衝險中  
間通賊要路在東則大廟疇囉馬尾劉家  
寺兒大碾子八泉吉三灣在西則小紅溝  
硝水紅莽牛七里口紅柳樹李智壩李哈  
刺峴迭烈遜一盤泉等處然溝面不寬山  
崖陡峻惟黃羊坪裴家川一帶實居諸隘  
之中離河四十餘里南枕雪山北接劉家



寺兒溝口東聯旱平川白崖子亂骨堆鎖  
黃川山勢斷落川原平廣水草便利正與  
河外虜巢大小松山蘆塘湖相近而五方寺  
沙金坪則又在其指顧襟帶之間矣猾虜  
頻年大舉入寇必先聚結於此然後分兵  
諸隘以入此其總會要害之地也大率以  
裴家川適中為主自扯木碇舊堡河口起  
至五方寺塔兒灣白草川墩止共長二十  
里沿河築邊一道每二里築敵臺一座及

於順甯適中築小堡一座又於裴家川背  
山面河築大堡一座議設守備一員駐劄  
其中提調沿邊以據大虜聚結總路其餘  
東西隘口或修舊垣或築新牆或添墩堡  
或立月城或剋崖塹通計邊牆二十五里  
零二十六丈敵臺十一座裴家川大堡一  
座順甯小堡一座哨馬營二座月城三座  
共約三十四里零三十六丈約用軍夫一  
萬一千有奇計一百四日可完除架梁客

兵馬匹料草不計外共該糧一萬八千七百餘石鹽菜銀六千二百四十兩通計以二萬五千兩之費勞一百餘日之工修三十四里要害之邊以收三百餘里河防之險外控強胡內屏諸郡况舉歸併之餘卒分撥新立之營堡官雖設而兵不加增備已周而糧仍舊額天險既固地利可興費小而利大暫勞而永逸籌邊之計未有便於此者合用銀兩查得固原州庫見貯修

邊民壯銀一萬三千餘兩堪以動支并靖  
虜等城堡防冬標節糧米八千餘石通融  
支給乞 勅兵部查議隨該部議覆題奉  
欽依備咨前來該總督右都御史戴 議將節  
年原派擺邊官軍內陝西正兵營摘撥二  
千及靖虜副總兵劉濟下見在馬步官軍  
隨行陝西總兵官呂經俱發裴家川做工  
不敷之數再於平鳳各衛所查明節年各  
軍勞逸酌量派調共計一萬餘名及整築

梁兵馬隨帶合用器具擇吉破土安設窩舖以便棲止并將同原州收貯民壯銀兩見在糧米陸續動發委官解送工所及行委靖虜副總兵劉濟提調架固原東路遊擊陶承譽分管築城原任叅將孟霖戶濂分段築牆仍責成王宮川總理稽察呂經常川調度務要催併官夫建築堅固以垂永久又節經分等犒賞以恤勞苦及委官不時查閱撫慰催督去後今據前因臣會

同議照裴家川居靖虜之北在中衛之南  
適套虜往來要衝委蘭固東西門戶向因  
險隘未設其中雖有膏腴田地萬頃人莫  
敢種今幸

皇上軫念邊防重計特允前議而督撫戴  
等恪遵

明命督調軍夫轉運錢糧悉心區畫行委各官  
料理修築計不滿三月之期完四十七里之  
工較諸原議省銀六千餘兩加多一十三

里荒涼草莽之境遽成保障之雄所據宣力  
效勞文武官員照部議錄叙以示激勸如  
陝西總兵官呂經固原兵備道副使王宮  
用此二臣皆當重加叙賚靖虜管叅將事  
副總兵劉濟固原東路遊擊陶承譽原任  
叅將孟來尸濂此四臣當併叙賚原任守  
備張應祥經歷楊橘主簿李縉各營千總  
官土邦安朱官韓守仁榮徵陳卿張羽陳  
保吳瑾各營把總官黃佩楊應元王勲羅

宗朝平承光孫昂陳實齊世勲馮恩趙梁  
鄭表范忠陳尚節鄒成石洞田濟民蔣天  
恩劉勲石寧聶續宗馬應武虎榜鄭重此  
數臣者似應行臣等量加犒賞者也及照  
總督陝西三邊軍務都察院右都御史戴  
忠誠體國殫力悉心亟成邊塞之工  
永貽安攘之績且工作不踰三月省費多  
至六千先任總督都御史今陞南京兵部  
尚書王虛心傳訪建議增修先任巡撫



陝西右副都御史今陞南京戶部右侍郎  
楊 矢心協謀卒成保障此三臣者似應  
特加優異者也若臣交代未幾倉惶奔走邊堡  
幸爾告成職分猶慙未稱何敢言勞伏乞  
皇上俯念邊防增修之難錢糧節省之多

勅下兵部議擬上

請施行庶人心益知感奮而邊防日見整飭  
矣

臺省疏稿卷之二終